

Яхшиликка далолат қилган киши уни қилган билан баробар экани ҳақида



16:16 / 22.03.2018 5668

269. (322). *Толҳа ибн Убайдуллоҳ ибн Курайздан ривоят қилинади:*

«Расулуллоҳ соллаллоҳу алайҳи васаллам:

«Ҳар бир маъруф садақадир. Яхшиликка далолат қилувчи худди уни қилувчи кабидир», дедилар».

Шарҳ: Бу ҳадисдан маълум бўлишича, ҳар бир яхши ишни садақа деб тушуниш лозим экан. «Садақа» деганда маълум бир миқдордаги пулни сарфлашнигина тушунмаслик керак. Садақанинг маъноси жуда кенг бўлиб, ниятга қараб ҳар бир катта ёки кичик амал ҳам садақа ҳисобланаверар экан.

Бировларни яхшиликка далолат қилиш, яхшиликка ундаш, чақиритиш, яхшиликка йўллаб қўйиш ҳам улуғ савобли ишлардан экан. Ана шу яхшиликни қилган одам қанча савоб олса, шу ишга далолат қилган, кўрсатган, тарғиб қилган киши ҳам шунча савоб олади.

Бу ҳадиси шариф яхшилик бобида катта қоидадир. Ким бир яхшиликка далолат қилиб, одамларни ўша ишга тарғиб қилса, ўргатса, ўша

яхшилиқни қилган одам қанча савоб олса, унга далолат қилган киши ҳам шунча савоб олади.

Уламоларимиз: «Устозлар, муршидлар, уламолар ва муаллифлар бу борада пешқадам кишилардир. Улардан таълим ва маълумот олганлар қилган яхшилиқларига қанча савоб олсалар, улар ҳам шунча савоб оладилар», деганлар.

Абу Масъуд Ансорий розияллоху анхудан ривоят қилинади:

«Бир одам Набий соллаллоху алайҳи васалламнинг ҳузурларига келиб:

«Менга минишга бир улов беринг, қийин аҳволда қолдим», деди.

«Менда ҳозир сенга берадиган улов йўқ, лекин сен фалончининг олдига бор, шоядки, сенга улов берса», дедилар.

У борган эди, мазкур киши унга улов берди. У Набий соллаллоху алайҳи васалламнинг ҳузурларига қайтиб келиб, хабарини берди.

Ул зот:

«Ким бир яхшилиқка далолат қилса, унга ўша яхшилиқни қилувчига берилган ажрча ажр берилур», дедилар».

Яхшилиқ қилиш жуда катта савобли иш. Шу билан бирга, ана шундай яхшилиқка далолат қилиш, ишора қилиш, унга йўллаб қўйиш ҳам ниҳоятда яхши ишдир. Ўша яхшилиқни қилган одам қанча савоб олса, мазкур яхшилиқка далолат қилган одам ҳам ўшанча савоб, ажр олар экан.

Бас, шундай экан, ҳар биримиз қўлимиздан келганича яхшилиқ қилайлик ва қўлимиздан яхшилиқ келмай қолган бўлса, ҳеч бўлмаса яхшилиқка далолат қилайлик, унга йўл кўрсатувчилардан бўлайлик.

Шайх Муҳаммад Содиқ Муҳаммад Юсуф

(Яхшилиқ ва силаи раҳм китоби китобидан)